

新安文獻志卷八十六

行實 吏治

乙集

元中憲大夫浙東道宣慰副使程公墓銘

揚志行

公諱相字仲和姓程氏徽州歙縣人宋咸淳初以從祖丞相吉國公元
鳳郊祀恩奏補登仕郎及朔南旣一禮部尚書謝公昌元用故官薦得
信州錄判方踰年以母病去改徽州路司獄轉從仕郎婺州路蘭谿州
判官調承事郎台州路寧海縣丞轉承直郎臨江路清江縣尹轉奉議
大夫常寧州知州兼勸農事遂以中憲大夫浙東道宣慰副使致仕至
順三年二月丁卯以疾卒年七十七環谷其自號也曾大父諱放宋贈
太師魯國公妣吳氏魯國夫人大父諱元定於吉公為同母兄登進士
第仕宋為朝議郎父諱宏祖仕宋為浙西發運大使司主管機宜文字
以公故贈中憲大夫漢陽府知府上騎都尉追封廣平郡伯妣胡氏諱
淑能追封廣平郡君所生父諱有能仕宋至提刑司幹辦公事吉公以

兄朝議子死無後取公於族以爲之繼妻汪氏諱德繁宋樞密使綱之孫女前進士望江縣尉琦之女子勇燧以公蔭授進義校尉兩浙運司石堰場司丞女三壻曰池州路儒學錄汪之純曰曹州人匠官汪完澤曰鄭以文孫男五宗觀玄觀祐觀元觀山觀女三公幼而端重寡言吉公竒之謂必能亢其宗及爲司獄時囚滌濯衣食意曲盡察其枉者白出之在職八年舉重輕咸陰飲其施大德丁未飢蘭谿在浙東諸郡爲尤甚公旣勸其州富民發有以賑行省有命移粟以濟蕭山時疫方熾人莫敢往公聞命不辭訖事而疫卒不及後舟道蕭山泊夜有羣盜譟而來舟人舉燭盜見公驚曰是固蘭谿州判嘗移粟以活我者邪即棄去州有婦通所私而殺其夫以尸藏乃剗其腸并褫所衣遺道上若爲虎所噬者以不得骸殖告公視婦無戚容給曰若夫不幸死虎取其遺葬足矣婦旣去陰遣人躡之則道與一男子相耳語擒鞫之得殺狀且獲其尸人以爲神寧海人以挾私鹽爲因殺幼女誣避卒卒長以

私怨榜卒承公視其傷與詞異立直之清江有無田而輸糧者歲爲石萬蓋自宋靖康時權假於民以給軍刻石具存經理行郡欲舉其數加民爲已功公力爭不聽守震怒推辱將誣以罪公不顧徐曰吾爲民死無恨會上官至白之卒如公言盜起寧都軍需星火急公以夜繼日力取給訖不乏而盜平廉訪司委以覆邑旱皆懷金以伺公躬履民畝取其不早者罪之一私莫干邑小吏非名補者乘公出雜然入邑縱操事莫能輯公歸法之終其任一迹無小民時時以逋負殺子女誣債家邑官每以爲利公得其誣蔽之罪俗遂革行省命以郡糧數萬石運真州旁邑官皆行賂免公獨不辭出江風大作舟危覆公適酣寢夢神人長丈餘語之曰若心合天當護若以出險毋恐旣覺而舟已平及授常寧即以年迫休致遂告老在官一不以財賂自浼苟利民無劇易必力爲不自顧望沮止所植卓然蓋其官業所由來者有自雖不獲大施於時以及柄用迪前人光然旣休官貌日加豐中舒外澤步履不衰夜書細

字如五六十歲人與其兄承直郎松江府判文彬尤友愛遊處必偕妻賢子孝孫息滿前被紫橫金華焜宗鄙優游娛佚以享其年則天之施報何如也嘗豫卜藏穴深以金帛累身爲切戒疾既革即櫛浴更衣端坐而逝遂將以卒之二年其月某日葬之歛東潛川前事致其里人奉政大夫前饒州路總管府治中方君存心之狀謂銘於予遂爲之銘銘曰

程氏之先顯有遐承迨戒周旅伯休著稱煌煌史牒後系前仍暨茲元滌有烈無朋振身田閭配食陳庭本隆支茂宜蟄宜繩天球在宋遂相昭陵統官惟百吉國徐興稽立攷成名勲具登疑彼中憲志追前能佐州歷縣序進年升何艱不任靡重不勝卒參使節官以才弘一緇弗翳璧瑩淵澄篤易和適以佚餘齡尚羸康祿垂施孫曾有蔚者阡流融峙疑最其世榮末奕幽局按宋丞相吉國文清公世居歙槐塘而有別業在績溪仁里公兄朝議子運機宏祖宏祖子宣慰相子嗣承緣子主簿宗觀皆用公蔭入官子孫遂居仁里今鄉貢進士傳其後也宣慰此諱經兵燹失之子嘗閱中秘書而得之于楊

待制霜月齋藁中因書以昇傳用補家乘之闕

元龍泉主簿胡公 浚墓誌銘

胡汲仲

延祐五年二月戊午前吉安路龍泉縣主簿胡公卒家婺源州十一月已未葬其州高倉里龍泉族父炳文具書前進士江雷所次行狀一通授龍泉從子宗海抵嘗所識永康胡長孺建昌謹致辭伯父棄捐子弟之明日實奉奔走請銘會先生考試江右歸未到宗海既還復西走此土惟是羸焉諸孤哭踊伏跽鞠屬言置耳猶涉彌千里歷五程會朔請事嚴勞非敢云長孺與禮讓已告曰是書固言然何忍終拒遂述志作銘龍泉名浚字安國其先隴西李氏唐諸王子朱溫將篡屠滅宗室畧盡先是淮南將高駢死楊行密徐知誥相承纂緒保有淮江東西地微故歛州僻險絕與吳越鄰溫莫敢闚闔亡人樂奔焉有昌翼走婺源就考水大姓胡隱義之變從其氏舉明經中第南唐時不復公族姓矣是爲明經公云八世孫朝散大夫權知無爲軍事仲與兄叔登紹聖四年

進士第文章號棣華集無為最有聲故元符間太學為之語曰江南二寶胡仲汪藻兩公皆州人無為從子朝奉郎通判南康軍事持與兄搏舉紹興十四年鄉貢進士登十五年第南康登龍興元年第是為龍泉六世大父曾大父自厚朝奉大夫權知瀘州軍事孫太學登開禧元年第大父知先號經訓翁父萬太學中舍生龍泉個儻卓越企慕漢丞相武鄉忠武侯視瑣委猶埃燼沮濼將至濺已畏惡不敢近賦江左臥龍詩攄憤鬱時天下初混一未設科官莫敢喻教肆行道終日無聞琴書聲龍泉請於其父若其伯父次焱於明經公書堂二父為師集里子弟講經涉十年遂皆知聖學為發易十疑遠近來析剖其義至千餘卷學徒受成謀於族父炳文弟澄從西山之麓建明經書院宮室樞制視岳麓白鹿洞有加具養田三頃約三分租入以一供義學食費族父為之長譚經日聽者盈千人集賢學士吳公澄幼清記焉遂上名數于官猶未籍禮部州學為遺大成殿浮梁州百八十里徽饒境上曰太白渡

維鐵聯舟二十尺有奇買田給養祠公又作長壽橋明經橋里中建甘泉湖山二亭瀾茗煮水飲行客初太學嗜山水故蒔花藥種竹樹鑿池架亭富春芳塢間稱兩山翁龍泉日設酒棖請公所敬愛眉客嬉遊歌吟其中公預期八十且盡取藏粟周貧未及期沒猶以是年散財施米如昔言龍泉早失周姓母事繼母吳如實產已兄弟同食飲正十年無忤色遠言族無踈戚貧老月有養資鄉賢老時有遺傍近民病相救恤鬪訟爭可義理壁曉從容一語立解至龍泉縣請學惟詢訪先賢子孫諸生說書為文字少異其曹雖稚齒亦與伉禮膳士田為天寶桑林二僧坊貪賴府縣取證故藉將復歸之學吏顧賂謝不即予至則索文書授之翫靡多不能屈折事上官長吏不樂咄咄弗休嘆曰主簿尚可為哉即日謝病歸二月丙辰夢火光彌室日眇夢告子弟曰死日其在戊午乎吾生歲行適周矣是日果死嘗創書月高樓其家藏郡書寫疏廣教子孫多財賢損志愚益過置室壁平生論議疏曠而處

事詳密生計裕如而持己纖嗇食羨淡泊而奉客腴醲此其意固非在財利以私其身家子孫者也娶同里周架閣公孫女銘曰力嚮經術欲淑諸人敬教勸學是近於仁勇棄己私繫人其利飲枯濟深是篤於義世右盛氣浩然崇高侮言違道安得爲豪病痺弗知殊涂詭轍匪融一家何足爲傑允矣龍泉篤義近仁旣孝旣睦超邁不群志事有稽銘言無刺堂歸山存碑猶傳信

劉彥明德智墓誌銘

柳文肅公

彥明諱德智字彥明姓劉氏世家于歙曾祖諱元佐祖諱儒望父諱震皆隱德不仕鄉里稱善人焉初彥明之父以張爲後於劉生彥明四歲卒而張氏父固在實爲之經紀家事教育彥明至於成人張五子其一夭而其家素裕彥明尤大父所深愛將使還後天者彥明泣對曰劉氏無子故以吾父後今旣歿于劉氏明其爲劉矣德智以一身繫劉氏之宗誠不敢重獲罪於吾父與劉氏也大父感其言而止彥明少知自厲

於學好讀孫吳兵法旁究釋老方伎之書嘗因是感疾已乃大悟求之四書浩有所得久而下筆爲文覺其來源源纒纒遂得由庠序選爲建德路儒學正會教授闕進攝其事守郡者諷使文致直學之罪彥明不爲動俟間覆爲辨說考滿入教授銓翰林院方薦爲其屬而彥明翻然歸矣尋授永順等處軍民安撫司儒學教授未上中書刑部辟爲其部令史官有齎怒於同列而將黜之彥明曰無厭將及我投筆謝去於是都水監復羅而致之稍進壽福院掾壽福出納五臺諸寺錢糧其田入隸浙西數郡比歲浙西被水有司按實當檢放而院猶責償未已彥明適從其判官出行江南視其牘歎曰官民糧已罷能徵吾院田能獨無傷乎悉命弛之諸使怒其專擅而卒亦無能奪其議者嘉興有家民誣占寺田二百畝左證甚明而院所遣使速賂莫能決及彥明來請鬻路絕乃卒歸其田考成得將仕佐郎衢州路常山縣主簿滿歲江西省有知其爲者辟爲掾新執政至杖一掾而掾實無罪彥明竟歸曰吾唯不能

隨俗俯仰以至于是可再辱邪進將仕郎爲平江路總管府知事平江劇部案積叢勝彥明處之以無倦取其犯名義者一二事稍釐正之不激於奇不毀於隨暇則却騎入閭巷訪求耆舊聚茗縱談猶書生故態也閱再歲卒官下得年五十五天曆二年七月十四日也談者例嘗儒生爲政迂闊於事情而不知聖人之法制具於經儒能據經義法故達權而知變彼隨時重輕觀勢向背以竊取過人之名者豈所謂政哉彥明得於所學歷試內外階是以無失身敗名亦未爲無所見於世也彥明之配李氏姑女先卒子男二燿煜女二長適徐梅次在室卜地得建德之淳安縣開化鄉駝馬原距家餘百里將以某年某月某日窆先事其子煜具書世出爵年爲狀從其郡杜某父乞子銘其言曰葬而不得銘猶無葬也予嘗識彥明京師知其爲人而杜君又不輕於許予是可銘已彥明始字千里謂其取義之未廣也易以今字晚又號知非子其詩文曰紫溪集鄉先生方公回爲序而藏之予家家有仁本堂鄉相程

公元鳳大書揭之而陵陽平公徽記之彥明之祖程公錫也所謂仁本者彥明固服而行之矣銘曰守經爲本制變爲通通故能介承之自躬彥明本仁由學以充及試於事事爲之中考其成績粵有始終天不畀年歸于堂封有德有言遺後者豐尚百千年安此幽宮

貞白先生鄭公千齡行狀

程駸南

公諱千齡字耆卿姓鄭氏徽之歙縣人故歙令鄭君安之子也其先有諱球者始居歙之雙橋里以質雄鄉里號雙橋鄭家自曾大父孝全大父文政尚德樂義好施予至鄭君行之益篤嘗徒步千里歸內兄黃嬰盡推其家財與二兄寸田尺宅無入己者淮帥秦琳聞其賢辟符離尉不赴至元中唐鄧均三州招討使李木魯敬帥師臨徽討叛將李世達敗走進兵昱嶺關城且屠鄭君奮起杖策詣君門揖白招討亂由世達非百姓罪招討固奇鄭君聽之不屠城因署鄭君令歙三年有功德於

民民祠之號鄭令君公幼卓越七歲聞人講呂東萊春秋退即能衍其說從令君行沙上仰視飛鳶即問曰是何所憑依邪稍長師上鄉先生魯齋公一以躬行爲學及壯從令君入京師出入諸公貴人一時翕然稱許禮部尚書謝公敬德吏部尚書劉公伯宣侍郎夾谷公之奇交薦之於朝署公秩八品宋降臣留夢炎新用事吏部以白身南人例黜公待調行省丁外艱大德元年始板授寧國路太平縣弦歌鄉巡檢時徐道者以妖術惑衆弦歌之民皆徙市登山妄言禍福公擒其魁得誣罔狀衆盡駭散設布方畧察姦防盜民安其業始買地爲官舍旁爲屋榜曰弦歌書院日無事討論典籍後進視以爲師六年遷鎮江路丹陽縣延陵鎮巡檢首謁吳季子廟召父老謂曰昔季子薄千里之具而不王百世之下遺風猶在其民矧肯爲盜乎公等幸爲我戶致此意勿陷刑辟即日且十五日率吏卒謁拜祠下遠近化服水決練湖郡檄公督治公負畚鍤以身先士卒連晝夜風雨不倦水以不害丁內艱至大

年調處州縉雲縣美化鄉巡檢劇賊金卒二嘯聚無賴往來溫台處婺間白晝鈔掠吏莫敢誰何公潛遣聚石道旁山上匿壯士草莽中伺賊過飛石擊之賊驚走草中壯士大譟從之賊窮蹙圍之盡俘其黨皇慶二年調建康路江寧縣江寧鎮巡檢流民數千過丹陽市持弓矢刀槊殘害居民民不堪起而敵之衆數萬人擊散圍之使不得去公聞疾馳至解其圍單騎入流民隊中呼其長數之曰汝等皆天民不幸流移本欲逃生乃更速死殘害吾民何也叱其爲亂者數人縛之拘其械器驅其徒衆送之渡江適野見婦人哭而哀公使問故婦人抱嬰兒前拜曰妾孀也家貧唯一子尔有田若干與執家連執家僞契奪有之母子無以爲食是以哀也公曰盍言官乎曰執家不可言也有死而已他日公召執家語之且開以禍福執家感悟謝過遂歸孀婦之田有負篋暮投主人宿者主人方蚤設榻堂下戒之曰東壁敗缺宜謹視篋中歲東鄰之老見焉是夕亡其篋意東鄰之老吏執而訊之其子自外來面毀衣

裂若穿穴隙之爲者吏喜得盜獄成公曰其跡是其情非也緩之無何他郡獲盜乃嘗盜篋者也衆乃歎服去之日百姓遮道不得行公舉手謝之咸拜泣而去延祐六年始命于朝爲建德路淳安縣尉淳安介萬山中多長林深谷盜賊之所出没守禦者竝緣爲姦利公至盜賊稍稍引去而千戶汪元珪貪酷病民公曰盜在是矣即條上其罪府若省元珪坐罷境內晏然尉署傾圮公撤而新之取孔子荅季康子語扁其泣事之堂曰不欲署之東舊有梅隱軒西有桂笏軒皆廢公皆起之立朱子之祠表錢公之墓修淳安志書舉邑士吳君暉洪君震老夏君溥充試有司後皆知名泰定元年調徽州路祁門縣尉祁門亦鄉邑難治公集長老好諭之曰爲我約束鄉閭勤固門戶謹守望慎毋犯法人亦素服公威望人人自重縣曹失文書一櫃無所蹤跡檄公詰盜公曰是非盜也必愚民有獄不解計出無聊故爲是以戒誡亦即問吏有微事在官最重者誰乎吏曰某鄉某公即馳至其家搜捕有也唯一棺焉

文書果具在縣民馮華甫以孫壻爲後俗謂之補代馮歿二十年矣其族人訟之十年矣官不能決公攝縣事舉春秋宮節之義立馮氏子有僧言其徒育於已十八年其叔欲奪而歸之以爲後者公曰民無後後其兄弟之子禮也法閒民爲僧故有覆實之文謂非爲人後者今叔無子後其兄之子所以廣占籍明人倫僧柰何欲絕之命叔償其衣食之資歸其姪以爲後或訴康氏兄死不爲立後而有其資者公召問狀且云有毋公曰天下之愛其子者莫毋若也子死無後恐之乎召母問故母謂子死時七歲公曰殤子不當立後其訟遂息大修縣學建明倫堂門廡齋舍皆高壯宏麗尉署爲風雨所壞公發已帑新之其屬爭先趨事公曰必完必固無憂後人祁門與石埭青陽浮梁太平諸縣接界奸民數以僞鈔事誣連吾邑公燭其奸折以文移至十返卒不逮一民一日旦起從數卒東馳不十里奄入山中民家衆莫測所爲至則縛其人搜其家得僞鈔及器具以還旬有五日復入山羈其孽秋豪無擾所過

民相率拜道上及代歸老稚扶携送郭門外者十餘里不絕至順元年
陞從仕郎泉州錄事是時廷臣有言泉南並海多諸番寶貨宜擇廉能
吏爲守令者故起公馳驛就職公歎曰吾老矣母以貧介取辱即手署
致仕章上之明年夏四月感疾臥杭州傳舍三日子玉侍側從容語曰
吾思平生心身無可愧者可以見先人九原矣瞑然而逝身無遺衣物
布被破靴而已其友宜興王仁源爲貸於所親得錢具棺衾以斂玉持
喪歸舟過淳安淳安人皆哭迎送曰我公不復得見矣五月壬午玉奉柩
歸于家之正寢且卜葬嚴陵吳縣尹轍涿郡張副使士弘太原王教授
萱與其徒合辭言曰明公德行明潔正直不回請私諡曰貞白先生明
年里中父老白子有司請改善福里爲貞白建里門立石刻辭以表著
公德又明年朝廷以公前致仕章贈承事郎徽州洛休寧縣尹妻汪氏
贈宜人命始下公懼然長身顏自清古性恬澹無所嗜好衣布衣如錦
繡啗糲食如梁肉鄉鄰有貧病患難救之如不及與人語休休孝義忠

愛不飲酒對賓客有餘歡入郡縣不騎馬蒼顏白髮行市井間唯一童
自隨初欲與兄弟義居嫁喪祭各有儀式及志不得施則悵然取田
之磽瘠器之弊陋者退處於偏而讓其正居於昆弟居鄉如處女當官
臨事則剛毅奮發而有爲不阿長官不承風旨僚吏莫不敬憚之部使
者行縣皆曰鄭尉長者必加禮貌公前後爲捕盜官四十年未嘗任親
民一攝祔門令旬日間人稱其神明之政所至禮儒先興學校舉廢墜
功績反出縣令丞上旣去有去思惠愛之碑職專勢微德不及大施材
不獲盡展也公生於宋景定六年十月甲午歿於皇至順二年四月癸
亥享年六十有七娶同里汪氏即宜人先公十四年卒子男二人長曰
玉次曰璉女一人曰柔貞嫁同郡吳虎孫玉柔貞宜人出也孫男一人
女一人以元統二年甲戌歲十一月壬寅葬於里東方村之原宜人汪
氏同墓文郡諸生也始拜公于京師之旅邸即辱知愛數與公之子玉
游及爲黃竹寨吏當祔門道上聞祔門人言益信公平生德政又得公

之客胡默先生所記遺事頗詳謹序次如右玉將求諸立言君子乞銘以圖不朽焉

長樂縣程令君願學行狀

趙東山

令君諱願學字希聖別字節卿徽之休寧人其先自晉新安太守元譚以治郡有績錫褒詔賜田宅于郡因留家焉十三傳而至忠壯公父子以義節顯於梁陳廟食其鄉子孫蕃布天下而休寧之族尤繁衍多聞人君上距忠壯二十有六世十二世祖南唐檢校中丞雲始占居邑南以川會祖大明祖自得父逢午字信叔再領鄉薦一為魁不第即棄去舉子業弗為家居教授所學日益精詣族父勿齋先生雅敬之每過公所談論輒竟日數郡交薦版授紫陽書院山長著中庸義說數萬言益暢朱子之旨以為教學者多所發焉秩滿授嘉興路海鹽州文學命下而卒追贈承事郎徽州路同知婺源州事母吳氏追封宜人子二人令君其嫡長也少卓犖有奇志憤交游重然諾以行義自砥礪甫冠游京

師社公名士莫不傾倒嘗黎明與其友出郭外道過大第友入謁諉令君少俟比出已暮令君猶儼立不去蜀人趙公炸職秘府聞而嘉之即造令君與語大悅即日挈行李過其館授漿焉居無何有旨修職方氏書定公亟薦令君入書局書成同輩俱被優用令君獨後久之乃擢從事數十人惟令君為南士毅然特立儔列不敢慢嘗奉旨將段帛勞諸侯王之戍和林者後以王事屢往來嶺北不以艱遠辭也秩滿調鎮江路司獄旦暮出入犴狴察其寒飢痲疾者而時其衣食嘗歎曰彼固罪人然或以非罪死則豈天討之謂哉比滿幾無以為歸適有詔下府公乃以令君宣詔諸邑時使者所至郡邑皆斂諸民以為之贖府公夙敬令君欲以是為歸計也比至屬縣卒事吏以常例致贖令君呵曰我以賚詔來而取民財以去乎督其還諸民而後行比至他邑亦如之遷湖州武康縣主簿明法令申約束革其弊政豪右武斷者媚之相率重賂大府俾令君以他役入京比還則以憂去職矣服除轉循州長樂縣尹

循介閩廣之交遠宦者蠻夷其民弛法廢度肆其貪虐依託官府剝下
歸上者縣率數百人而長樂以僻遠尤其居民迫漁奪困征斂率逃竄
他郡其尤桀黠者負險隘操鋤梃以自衛間有出身奉上不避徭者賊
猾利其資產中以他禍足涉城市而家破矣君始至則盡得其姦黨巢
穴發以他事悉斷遣還其鄉里整飭案牒申明德意植貧弱寬徭賦分
清耆老入其鄉申諭朝廷治意民信其所為流亡之衆來歸者不可勝
紀縣治所寓生聚日蕃漸可比內郡都邑乃建先聖廟于治之西南勝
地擇其士之有學者為之師山谷之民大冠長裾來游來息彬彬然見
先代之遺風焉時上司人往來屬邑輒託散土宜以釣重賄邑則措諸
民以贈之君獨却不納而自割俸簿贈之人知君風裁不敢受而遂不
復來矣如在他邑則間道不敢令君知之邑有賴其妄訴黃某劫掠財
物事連數十人黃被訟不知所為舉族逃匿已五載矣州移檄下索罪
人甚急黃聞令君至即詣公庭自歸君呵曰汝盜也而逃邪黃泣訴曰

某與賴爭欄場耳非盜也不逃即舉家齧粉矣今聞邑有賢尹願得自
明君曰汝竄者甚衆今一人來安能明乃與刻日令盡領同竄者至黃
諾而上司以君擅縱強盜問罪黃所領先期至郭外聞之皆散走黃獨
嘆曰我寧死不忍累程縣尹也乃受逮州嘗以他名色斂民財憤君不
受命欲因此中傷之令黃誣君前嘗受賂黃曰某陷非罪不能自明寧
忍賊陷忠良邪考掠備極酷毒至死終無一語涉君州猶訊連坐十餘
人會部使者詹侯行郡直其枉君乃免民有死非命者其妻訴不願理
君呵曰此即殺人賊也一訊即服事連富人請以萬緡贖君君不納富
人懼重賄大吏移鞫他縣真得行已志且以成君罪君仰天歎曰使殺
人者皆可以財免罪則有財者皆可殺人矣天地鬼神其可欺乎他縣
果問如富人意吏袍成安將署忽大雷雨書檄棟折瓦墜官吏震駭失
文書所在竟實不敢復問羅江五峽諸蠻時出掠邊境大府發兵捕治
畏盜不敢逼遣介誘諭令納缺折弓力即以獲寇反命豪酋視官府如

無為暴益甚民其苦之會有郡錄入郡境劫財物殺人盈道郡邑吏不敢問反致羊酒囑使他去盜果入長樂境君自領卒要之於道縛其渠魁七人餘悉散走邑簿尉懼變室宿舟中視緩急為去留君不為動曰寇來吾自當之集吏民授以方略使各分守隘要益遣卒捕逐其餘撩大懼終君任不敢涉足長樂境邑素多火災民言城隍神衣朱所致請易之君曰火災由民不謹尔乃下令浚溝池修火具廬舍苦蓋者易以瓦在職五載火不復作民以為神相之矣長樂去家數千里僅以一僮自隨五六年間介然如一日也秩滿歸舟行至廬陵之十八灘以疾卒時子植在侍遂欽以時服元統乙亥年六月十七日也君生於至元丙子五月四日壽六十歲植奉君柩歸葬于里之深坑源後十年甲申君之執別駕王公伯顏察兒來官于徽訪得君之子講通家之好比滿謂選于京求得君歷仕政績于吏部朝命以承直郎直定路中山府判官致仕寔至正八年六月也令君氣稟剛明資貌挺特而操行清苦且

承故家令德凡游交皆國初老成鉅公其所薰陶以成就者為有自來故歷官中外忠而不諛勤而不擾廉以自持誠以接物又明練法律以輔之是以遇事有立不以禍害變其所守而宰物者亦赫然臨而鑒之非其操心行事不愧不作者能如是乎君沒後客有游江西虞公伯生之門者公聞令君已沒歎曰斯人有用世之才若在今日急緩可仗惜其年未甚遠位不足以展布其才耳其為當世名流所知類如此夫人滕氏贈宜人令君無子弟幼學早卒子男女四人君拊之如已子植其季也遂為君後孫男二性上經孫女二人訪雖不獲議令君而締交於植且聞君家世及君持身莅官之實為詳切謂於古循吏無愧也故為述其梗概裨上之太史氏以圖不朽焉

新繁胡大尹壽安傳

趙輔之

胡侯名壽安字克仁世家新安相傳安定先生之後也洪武庚辰秋領鄉薦書入成均歷事天曹筮仕河南信陽令大著能聲尋調真定之獲

鹿政聲益著未再着丁內艱永樂甲午冬服闋復宰新繁親篆初首詢
民瘼事有不便於民者罷之有益於民者舉行之每歲初自巡視鄉村
勸民播耕遇田畝荒蕪或垣屋摧壞者詢其窘乏之由必捐俸資給常
以古靈先生教民之言諭鄉耆里甲俾知親睦安分之道率皆從化侯
性清儉在官惟麤衣糲食如韋布士嘗眠一紙帳自題句云紫絲垢障
簇春華臥雪眠雲自一家雪又不寒雲又暖扶持清夢到梅花其雅淡
之情槩可見矣永樂乙未夏數月不雨田疇龜裂侯齋沐禱於神二日
果大雨後圃種蘆菴數畦使客往來者採之以供盤飧或爲餽遺之禮
人呼爲菜知縣其子從新安來省兩月烹二鷄侯怒讓曰飲食之人則
人賤之矣吾居官二十餘年常以奢侈爲戒猶恐弗能全始終之志爾
今好大嚼詎不爲吾累乎其子服訓亦甚淡泊侯三宰大邑未嘗携妻
子之任或曰子之名固美矣奈妻子何侯笑曰此庸者之見也吾豈無
糟糠之義而不念乎嘗於是思之爛熟耳且夫吾輩昔讀聖賢書論若

官治民之法孰不欲砥礪名節以操守爲志及登仕路則以耳目玩好
聲色之物敗身家者比比焉矧婦人小子輩其性猶水有以金珠錦繡
搖目之物蠱其心彼必欺吾而竊取之借使僥倖不露吾去任後人必
詈笑曰胡某外佯廉而內實貪以是計之故不欲妻子之累身也是時
彭邑故令魯姓者寡妻王氏本戎家女年少而容艷資產千計常慕侯
之才德欲嫁之懇所親導意以諷侯侯曰吾將五旬未嘗爲失節事今
若娶此失節之婦受此不義之財則吾亦爲失節之人行止掃地矣言
者大愧戊戌春侯將考績囊書鑿然惟畜一馬欲售爲程途費馬忽病
命醫醫數陳其治之數日弗愈其家人來報曰汝妻死矣待汝歸方殯陳
聞哀慟良久曰妻已死我至家安得生我宰公平日粗衣糲食撫民如
子未嘗取我民半錢吏不敢欺我里甲無敢擾我俾我民安於耕鑿皆
宰公之恩也今赴京而馬病若此我若離去馬必危矣宰公以何爲路
費乎我寧負亡妻不可召宰公乃遺書諭其子曰喪具稱家有無日吉

則窳窳毋候我歸也侯祖帳日繁邑之民遮泣於道者千數雖婦人小子如悲親戚民以驢者皆卻之詩僧解定素爲侯所敬以布帛數端黃蘆葍十枚懇餽再四侯雅重定惟取蘆葍一枚餘皆還之耆民臣榮宗等強留雙靴以昭惠愛至今存焉

故沂水知縣鄭君肇墓誌銘

趙子益

君諱肇字太初歛之豐口人其先居律村至諱再能者有子八人胤嗣最盛曰惟簡其後有之純與朱子同榜進士官德興尉曰惟政其後有義琮始自律村徙豐口義琮七世至諱元昇者君曾祖也祖宗勝父時雨世業儒妣鮑氏繼妣謝氏公生而溫厚有志操幼被選爲郡庠生治詩經晝夜妍窮率漏三鼓或達旦不寐業大進然累舉弗偶永樂丙戌以貢登太學自治經外辭翰書札之事尤精會有詔修永樂大典君復被選與事自揔裁而下多器愛之書成受賞勞宴錫久之授泲之處州遂昌知縣時古廉李先生方在翰林以文送之而勉其遠大君律

已廉慎涖事寬簡政不宜於民者卽更張之而尤以敦厚風化爲務歲旱齋沐禱諸神祠雨應期至歲復大穰民以爲誠意所感修葺學校課試諸生而躬較其優劣士風益振君以二親在堂遠不克就養以瞻雲名軒邑士夫多爲之詠歎會前尹坐事者復職君例還京師臨發之日民遮道涕洟不忍釋隸事冬官受命賞勞漕運官軍于兩淮事竣無擾尋易山東莒州之沂水持身愈謹施政愈密民樂從化一如遂昌時方營建北京役事嚴迫君督起所部夫匠焦心撫綏上不稽事而民亦無怨且念僚采董工日夕勞逸宜均身往代之君無何講疾不起永樂戊戌四月十六日也長嗣瓘奉喪南還君生洪武甲寅九月四日享年四十有五娶徐氏明慧溫恭號稱賢配子四人長卽瓘次瑄次璣次遂昌尚幼女三人長適汪士仁次適閔士成次適程志方孫三人曰颺曰莊曰和以宣德四年十二月二十五日與徐合葬于豐溪之原瓘等以狀詣予泣拜請銘璣從予游敏而文瓘瑄謹飭亦皆嗜學予知鄭君

之有後也遂爲之銘曰

卓哉鄭君幼負氣節奮身郡庠精妍儒業尋登太學纂修文淵出宰遂昌德化是先視民若子民視猶父遭時孔艱靡一失所調尹沂水治政如初趨命赴工奄然而殂歸葬豐溪山奇水秀君子勒銘有燁其後

故進士知上虞縣事鄭公行簡行狀

鄭騰海

公諱汝敬字行簡姓鄭氏以字行居歛西貞白里其先當宋天禧中有諱球者始來居之至公凡十六世以儒業相授受高大父諱珪師山先生從兄弟也曾大父諱紹從學定宇陳氏有民功民祀享之妣金氏以節聞大父諱子初從學師山自號易求居士妣汪氏父諱希用以學術受知郡太守三山黃公母鮑氏會昌同知仁之女公生而秀異夙知向學里舉充縣庠弟子負攻書綴文日出人表尤善爲詞說明白委曲以達聖賢立言之旨部使者至有司輒引之進講無不愜服嘉獎然屢赴秋闈弗利入太學年甫二十有九時胡公儼爲大司成二見奇之

問學大進公退謂人曰吾得胡先生講明所學僅三月爾雖讀書三年弗及也未幾連舉永樂乙未進士第觀政秋曹適吏部掄選天下候銓官先後倒施物論不平公曰進賢不能以公其如天下士何遂以疏聞詔從其議吏部滋不悅然 朝拜由是知公名命往督陝右糧儲公性嚴毅所過有司督責無少貸多忌之者遂中以罪坐役北京公平居與兄迪簡弟懋簡極友愛至是皆傾貲赴難先後死逆旅聞者悲之縉紳多爲詩歌以道其事者役滿除知順天府永清縣事永清爲畿內大邑號叢脞公治之有方不煩勞而事以次理嘗有中貴人臨縣索賂甚急公不爲動遂給入見縲紲之欲置之死士民遮留解還公卽以狀聞

太宗皇帝怒欲置中貴人罪會

仁廟嗣位赦免無何公得代去 朝廷適有大役工部復命公監焉間有大臣得罪而服役者前官置之公曰此非所以存 天怒也請役之乃已既又謂工不宜久興勞民非使上言負其役調紹興府上虞縣先

是爲令者適以貪冗去民素知公名皆踴躍歡遊載道公亦樂民之向
方也爲之抑豪右劾農桑賑饑窮治興梁棧道而大興其學官官無愆
期之需獄無留嘆之訟居二年邑大治監察御史尹崇高號嚴厲有司
多望風引退獨加賞公嘗問紹興守六邑令孰優守曰惟鄭令清介肯
爲但其人氣大爾公曰人惟有氣斯能生聖賢能養是氣故充塞宇宙
可無氣而爲人乎守不能答既而考浙江七十二縣令置公爲第一凡
別邑有疑訟不決者多付公理之公亦悉心民隱不遺餘力然同僚猜
忌日甚先是邑有耆儒曰柳南仲賢而有文公雅敬之閱其貧贈以綿
絮南仲狷介亦不欲直受令君惠以錢百文橐詩爲謝公辭錢受詩而
同僚卒以是誣之議者不覈將左遷公公曰是尚可以仕乎且毋夫人
年高無以爲養遂自解職歸上虞人請留不得相與擁泣而去其居家
也首躬祠堂朔望奠祭一用朱子禮日坐太夫人堂上菽水盡歡訓諸
孫讀書以無隳堯人之業暇日幅巾長裾逍遙泉石間或引觴賦詠世

事一切不以介意閣老陳公循尚書徐公琦孫公原貞通政畢公昌知
府張公巖累復起之力辭不出天順己卯某月某日以疾卒享年七十
有五配畢氏子男二長曰綬次曰綰綰先卒女二孫男五鸞鳳鶴鵲
始公捐館綬以貧不能襲事喪留于家凡六年成化丙戌十二月某日
始克葬于巖鎮之塔菴官道傍嗚呼吾歎古稱多士然未有第進士者
至公始以麟經取第人莫不以遠大期之公亦自奮迅思有以自効君
子謂公使當風紀之任必能繩愆糾繆以輔
上德揚清激濁以振士風可以踵桓鮑趙唐之風而不忝然卒坐窮以
死是雖公之不幸亦士之不幸也謹狀其實如右載筆君子覽焉因其
言而知其行即其行而思其心庶表墓有碑誌墓有銘託以不朽云

奉直大夫泰安知州施公守正墓誌銘

戚太史

公諱泰亨字守正其先東魯人九世祖諱禮有膽畧從宋高宗南渡爲
參軍始居新安之休陽洪武初有曰伯起者由白沙巡檢善武事授民

兵萬戶兼管德興銅冶沂州判官權高唐州事撫安人戶八百二十墾
田地三千七十九頃子姪皆尚禮義邑人咸曰萬戶家此公之伯祖也
祖伯凱父孟敬隱德弗耀妣金氏有淑德生子三人公居仲爲兒時重
遲不戲恒若有所思計畫及壯材貌魁岸有大志永樂申辰有司以茂
才舉授鬱林州判官未幾轉泰安州判官爲政一以愛民爲心而絕私
賄理詞訟以情不爲文刻在任九年俗大成帛餘於庫粟餘於倉人樂
田廬謳歌載道旣去任州民千餘抵京請留侍郎王公上其實陸泰安
州知州正統九年以母孺人在堂陳情

上嘉其孝思特許省祭居家未及三月孺人歿哭泣盡哀正統十年四
月賜 勅命褒其政成贈父同其官封母太孺人妻孺人正統十三年
服闋將有陞擢泰安之民間之資糧奔走不約而會于
京師者五百餘人稽首 闕下

天子憫其情允之復除泰安州政益勤澤益廣民愛之若父母景泰三

年考滿以疾致仕日以泉石爲娛足跡不入公門天順元年六月十二
日卒生洪武甲戌九月初八日春秋六十四以天順三年十月十三日
葬于車由原先塋之次公內外行完潔白奮勵居官民不忍其去居家
人稱其孝悌是無愧爲君子者矣元配葉氏繼孔氏先聖五十八代孫
繼趙氏子男三人未奇未貴未秀女三人婿蘇琪汪儼金驥孫男某旣
葬之五年辛巳其孤未奇泣告于其縣尹餘姚邵公走書幣并狀來乞
銘邵予姻也弗能辭爲序而銘之銘曰

良才舉世經涂闢三莅奉符藹嘉績 龍章煥爛自

天錫民不恐違街厥澤甲子又四及玄宅作詩孔昭質貞石

通奉大夫河南左布政使程公泰墓碑銘 家乘

成化庚子秋予居先少保襄毅公之喪聞人傳吾河南左布政使用元
以七月一日終于官爲之驚怛曰噫噐宇間學行檢才識在一時負公
輔之望如用元何可多得而遽至此豈造物者之乖乎是歲冬予以

賜葬 恩入謝遇其觀邵伯河下旅次不能為禮唁其孤而別暨予南
還則用元葬矣孤旦奉邑人前監察御史康君永韶狀請銘其墓上之
石嗚呼其尚忍銘吾用元也哉惟程氏自東晉新安太守元譚以善政
為民請留始家歙望墩至梁將軍忠壯公靈洗起兵拒侯景廟食于郡
忠壯十四世生唐檢校御史中丞漢又起兵拒黃巢凡再世有全郡之
功其居祁門善和里者祖中丞長子檢校戶部尚書仲繁用元所自出
也居休寧陪郭者祖中丞季子歙州兵馬先鋒使南節予所自出也故
予之族於用元為近尚書十八世孫德堅 國初以行樞密院都事守
景德鎮是為用元高祖曾祖汝楫祖景華俱不仕父顯起鄉貢進士官
至 韓府左長史進朝列大夫母齊氏封宜人用元天分最高喜問學
初長史公以春秋名祁門用元受經所得最深又旁通諸經史正統中
長史公教諭河間任立而予家先以尺籍隸河間襄毅公每往來叙宗
好雅愛用元以為是必亢其宗者歲丁卯領南畿鄉薦登景泰甲戌進

士第觀政戶部乙亥奉 命犒師宣府總帥厚餽悉卻之都憲葉文莊
公方督邊餉與語大悅天順改元授戶部江西司主事己卯犒師陝西
時尚書年公待部屬嚴甚獨禮用元三載以績最聞 賜敕命督餉淮
安一年代還上書乞歸省分祿養親從之癸未會試用薦充同考試官
儀曹奉內幣踵門用元力辭免禮部尚書姚文敏公歎曰超出流輩遠
矣未幾進署福建司負外郎督負徵于天津諸處甲申實授成化改元
進署郎中丁亥實授三載復以績最聞 賜誥命是歲用兵遼東遣用
元給軍實師賴以濟庚寅遣視山東災上書言四事曰存漕運以防民
飢整兵備以衛民生減養馬以安民心增接廵以紓民力事多舉行比
還擢廣西右叅政安南以地界不定數近邊用元冒險往定之乃已理
焚修墜政漸以成壬辰以齊宜人憂歸而長史公卒喪葬一以禮拓先
祠以謹時祀輯先德為世芳集以傳服闋改河南右叅政奉
璽書專理國儲定轉輸遠近適均法以便民又以其暇時葺二程夫子

闕里祠宇以風其士人戊戌進右布政使明年進左布政使律已守法以倡寮屬一方晏然欲自引章具未上而疾作矣所部黷然聞者愕眙以爲善人之不幸距生永樂辛丑正月一日享年六十以壬寅春二月二十日葬里之宅裏塢用元爲人恂恂謹恪口未嘗及人之過巧佞者或竊笑之然其中涇渭極明有確然不易者卒居恬澹寡嗜好疑若不柰繁劇而所居官理不亟不徐喜功邀譽者反出其下蓋人陰被其惠澤甚多而世亦未盡知之爲學不事詞藻雖時賦詩寫竹以適其適而緘其藁諱其名終不以自見也用元初娶祁西汪處士景淳女贈宜人再娶 趙府長史同邑胡公永興女封宜人三娶故吏部侍郎淳安項公文曜女俱善持家以佐夫子子男四人長昂曾學訓科汪出次日攻舉子業次杲儒學生皆胡出次昌項出孫男二人長錡次銓次錮女四人俱幼銘曰

惟我程氏世顯新安有譜振振有廟桓桓自飲之祁垂休委社大集于公策名進士階屬司徒幾二十年巡覆四方犒師三邊擢領藩宣或副或正桂管遺思洛省胥慶祖我循吏以惠其民宗我師儒以迪其人名與業崇宜位公輔庶歸厥施以澤下土堪東而踏中棟而戕士類孔傷予懷曷望宅塢之原山水明秀如有遺芳式在其後

新安文獻志卷八十七

乙集

行實 遺逸

梁胡太常 明星傳

續圖經

胡太常明星字太白新安縣人梁天監初為國子生時有詔定正雅樂
 選生徒數十人肄其聲容明星與焉樂成授湘東王府法曹參軍入為
 太學博士值修五禮僕射沈約請五禮各置學士一人令舉學古者一
 人自助乃以平原明山賓河內司馬聚建平嚴植之山陰賀瑒等分掌
 瑒舉明星以自助累遷尚書祠部郎八年春高祖祀南郊詔諸儒議禮
 始服大裘寵封禪明星悉與其事九年視學命皇太子及諸王皆入學
 以明星兼太子家令五禮成遷太常丞十三年耕籍田祀先農明星奉
 引深有禮容高祖嘉之拜通直散騎侍郎除秘書監遷太常卿高祖晚
 年崇尚釋氏詔宗廟用牲牢有累冥福宜皆以麵為之朝野誼譁以為
 宗廟去牲乃是不復血食明星與侍郎周捨等上疏極諫不聽未幾捨

坐事免朱异代掌機政朝儀祀典多所改易明星諍之不得遂棄官歸
黔隱居橫岡時普通六年也後累以遺逸徵不起明星里居過黃姑墅
見郭外多荒田未闢詢之云不通溝洫也明星惻然親究水源傾貲募
工穿二渠約十里許導城北溪水逶迤而南溉民田千餘頃歲屢有秋
其卒也鄉人感其惠立廟橫岡歲時祀之歷代不廢元初裔孫京重建廟事載洪武祖新
續志

南唐汪處士台符傳

羅鄂州

汪處士台符歙州人博學能為文好王霸大畧唐末見天下方亂力耕
不出南唐先主輔政移鎮金陵台符往書陳民間九患大率以富國
阜民為務先主善之且加條問而宋齊丘疾其才高屢加詆訾齊丘始
字超回台符貽書譙之曰聞足下齊先聖以立名超亞聖而為字齊丘
大慚改字子嵩後使親信誘台符乘舟飲夜縛其口沈石城河蛟磯
下先主聞而惜之昇元中檢校民田物產尚下三等科其均輸為定制

又使民輸粟請鹽罷其科借商旅實萬則征之過者則否舟行無力勝
之稅郡縣吏胥降而有限凡數十年民得以小康皆自台符發之殆符

碑或以館驛巡官九江巡使等冠此
特祿仕之賤者故依江南野史補處士

宋汪長者廷美傳

羅鄂州

汪廷美婺源人孝友純至義居數十年聚族四百口旦暮食必同席有
未至者不敢先廷美節嗜欲身衣縑布非因祭不食肉親喪盡哀不應
賓客遇忌則終月齋肅祥符中東封赦減天下賦十之二廷美亦減其
佃者租十之二乾興頒遺詔衰經號慕營佛齋者七日幼為鄉官人嘗
賀以一縑後悔倍償之嘗以秋冬賑糶或勸須春廷美曰家欲蓄藏待
價貧人乏食於爾安乎遠賈有鬻香者去後發其裹得金追而還之嘗
使兄弟子鬻縑帛進賢界中買銀數百兩以歸廷美察其贖不復言他
日袖而弃之淵里人或竊其鵝問之曰夏至將以祭先廷美曰彼貧乃
有孝心助以魚酒又有從質麥種十石者過期遇之給言種敗無所收

廷美還其質更遺麥三石以償其費性不嗜殺牛罷老不堪用者終飼養之子姪諸孫有過未嘗形言但訓以自昔興替之家嘗有抵辜匿者吏以爲當坐家長廷美時年六十九或言稱七十宜免廷美曰吾失訓又增年以免罪是誣官也不可會有赦遂免郡守欲奏表門閭力辭時號汪長者將終徧爲書別親舊翌日而卒年八十九慶曆中知縣秘書丞蔡巽據其事刻之石

取上丈人汪君 紹傳子存

汪路教

取上丈人汪君紹字子傳唐侍御史濟之六世孫嚴重好義崇德樂施父歿七弟二妹冠笄婚嫁皆如禮宗族貧病喪葬隨宜周急人稱曰取上丈人嘗於其居之南闢義學教授鄉里子弟曰四女堂捐田三百畝以贍師生學者無裹糧束脩之費四方聞風踵至婺源縣簿呂廣問值靖康之變不能還留以爲師廣問嘗遊尹公彥明之門與聞二程之學君之子存方以西京文學辭官歸養遂得與呂公游盡授其說初驛道

由里中以達休寧之黃茅曲折沿澗谷水暴發則橋道皆壞鄉人病之君言於郡府願以已資闢芙蓉對鏡驛道直抵黃茅較舊路近十有五里且無水患娶朱氏韋齋先生之從妹家庭間親屬六十餘口義居雍睦君二子長卽存字公澤次仔字公育存元豐七年領鄉薦時年十五明年獻書禮部不報元祐三年戊辰與仔同入太學知名試每魁諸生而廷試累屈不肯媚附權貴人勸令少損答曰存不敢獲罪聖人之門他非所知也既而授西京文學上封事極言時政得失不報辭官歸養招延四方士予以講學焉學者稱曰四友先生政和八年復遊京師值躬耕藉田獻頌上悅賜束帛又上書訟知州王愈之屈復其任初愈以修撰知信州禦方臘有功宰相王黼害之坐軍被折貸歸田里存辨之愈得復知無爲軍省府咸重其名交章薦聞六館之士請於朝願得存爲師存終以所言不得行堅辭歸胡仲狀其行畧曰才氣剛毅言行端恪其志弗獲施故深造自得真儒林之豪傑後學之楷範也門人王炎

贊其遺像曰學淹博而趣約識高明而旨微文雅健而有法行修潔而無疵生民之望後學之師其施不遐其蓄不貲道與時背志與願違九原不作吾誰與歸孫全字仲協治周易政和五年入太學開府張公琮見而奇之妻以女靖康初金虜圍京師諸生乘城全在其間倡上章任李綱以却金虜既而隱避不居其功欽宗即位上表與免解三試禮部志弗獲伸高宗中興紹興郊祀許免解就殿試而全見奸邪並進舊疆未復翻然歸老扁其讀書之所曰叢桂軒隱居教授與公育同居孝悌義讓乎于遠邇人稱曰叢桂先生考而張公琮所作墓銘不及之豈當時洛學之禁方嚴故不敢公誦之耶

環溪翁程君墓表

朱文公

環溪翁者先君子韋齋先生之內弟程君也諱鼎字復亨徽之婺源人少孤從先君子學於閩中因得講聞一時儒先長者之餘論而心悅之抄綴誦習晨夕不少解先君子愛其勤敏於其歸書六言以贈之皆事

親修身為學之要君拜受其言以歸益自樹立務記覽為詞章思所以大其門戶者然君為人坦夷跌宕不事脩飭好讀左氏書為文輒效其體不能屈意用舉子尺度以故久不利場屋家故貧至君益困終歲奉親徙居窮山中自號環溪翁山田數十畝環堵蕭然無以卒歲而君處之泊如也晚益不得志因自放杯酒間酒酣諷左氏書雜以國風雅頌之篇聞者聳然傾聽俯仰疾徐之間頓挫抑揚如有節奏至於放臣孤子怨夫寡婦之詞又未嘗不三復感慨而出涕流漣也庸夫孺子從旁竊觀或笑侮之君整然不以為意蓋其中所抱負有不得騁者故托以自遣至他行事則其不合於理者固鮮矣乾道元年年五十九以疾卒後十年君夫人胡氏亦歿遂合葬于懷金鄉福臨里允泉之原蓋新安番陽信安諸程皆出梁鎮西將軍忠壯公靈洗其家婺源者又自歛之黃墩徙而來譜牒具在聞之先君子忠壯公葬黃墩以石為封今尚在也君家自其大父翔始與鄉薦久著亦以郡學上舍嘗貢京師皆不幸

早卒至君學益勤而其師友淵源所漸者益遠顧亦不逢以歿其世而有子曰洵好學而敏於文君奇愛之曰是足以成吾志矣既又屢薦不第今乃以特恩授信州文學識者恨之然洵故嘗從熹論為學大要意其所以成君之志者在此而不在彼也熹祖母君之姑因謂君叔父勿從先君子在臨安時時見君來先君子或留與飲君必盡醉而論說衮衮不能自休既長歸鄉里又得拜君而君辱教誨之則君益以老矣然得酒輒歌呼談噱意氣猶不衰也今又三十餘年洵乃以書奉君學徒李縉之狀請表君墓慨念始終顧二父於今皆不可見而熹與洵孤露之餘亦俱老大乃流涕而書之蓋以重歎君家之不遇人予潦倒無以副君疇昔之意而自悲也嗚呼尚勉之哉淳熙八年八月乙卯表姪宣教郎提舉江南西路常平茶鹽公事朱熹述

此尚有少曲折異時得面論而後下手乃為穩當觀此則朱子於母黨先德慎重如此 幸齋先生送程復亨序廣平程鼎字復亨謂子外兄從子游於洵者二年子語以安逸憂患知之詳矣將歸省其母及其祖母其可以無言司徒文子問於子思曰親喪三年未葬則何服子思曰

鍾山先生李公縉行狀

程克菴

三年而未葬則不除也故告之一曰葬吾舅而後加吉服夫子失魯司寇將之期先之以子夏申之以冉有曰喪不欲其速貧古之君子以失位於諸侯口喪不扶自直植之榛莽則委靡然故告之二曰葺爾居以爾親蓬生麻中不扶自直植之榛莽則委靡然故告之三曰葺爾居以爾類者勿親也江出岷山自荆之楚注洋千里而至於海者大川三百川三千以爲助也故告之四曰廣學問以資見聞安安鴉毒不可懷也君子非獨惡懷安之敗名惡其敗性也故告之五曰勿懷安男子生則以桑弧蓬矢射天地四方示志也夫以不貴之軀豈浮沉鄉里而名不稱故告之六曰無忘四方之志夫齊之善味者淄澠之合能辨之淄澠乎尚能爲君辨之宣和辛丑歲八月日

先生緯縉字參仲姓李氏世新安婺源儒家也曾大父蒙大父居注皆隱居不仕父鏞始游太學知名建炎初以累舉補官爲南康軍之建昌尉饒州司法參軍太平州軍事推官以沒先生推官公之長子也少穎

悟讀書日千言詩易禮皆畧成誦而尤精春秋左氏傳屬文敏甚自朝廷設元祐學術之禁士非王氏書不讀宣和禁稍弛而遠方人士扭於

所習未盡變也婺源又居重山復嶺間見聞尤狹陋逮兵興四方雲擾

賢士大夫多避地其間於是有呂公兄弟曰和問曰廣問者和靖尹先生高第傳伊洛致知篤敬之學又有俞公靖者亦里儒先也多識前言往行其學出入坡洛之間先生與里人滕公愷悉從此五君子遊滕公長先生六歲負才氣不肯友不如已者獨器重先生目爲小友嘗將閩中所刻東坡先生文章號大全集者相與讀之歎其編次無法真贋相雜奮然取朱黃盡塗去不類者滕公見之驚曰子後生敢尔邪他日得蘇氏家傳本校之果皆非也益竒之乃出一編書示之曰好文而不知道空文也此書吾得之羅公皆河洛遺言公戒勿輕示人吾今日爲子發內府之秘矣先生受之以歸口誦心惟默若有省間有所疑又從諸公質之於是學問日進復待推官公官南康遊廬阜識隱君子祁公寬亦和靖學徒也聽其言多相契者然猶疑其未也出入釋老求之者數年知其說不出乎吾宗乃益自信遂厭科舉之習卜築雲山間爲隱居計名其山曰鍾山榜其室曰中林常曰兔置武夫微賤之人而中林人

所不見之地也以微賤之人處人所不見之地而能持之以謹齊之以德則可以爲公侯之腹心然則人可怠於自修邪自是優游涵養學益成行益尊鄉人宗慕之然先生讀書不務多爲訓說獨嘗著論語西銘解義山憲業書數篇而已有來學者隨其資誘之循循不倦其言曰敬者心之閑轡也心有不敬焉則馳矣敬而不已則明明則誠故學者致心之道敬爲要又曰禮義廉耻是謂四維勇於棄廉耻則勇於廢禮義一維苟絕四維皆滅理之相牽聯者也四維張其心康其身昌四維不張其心荒其身滅亡故學者持身之道知耻爲要又曰學者於道能致知以玩索之篤敬以涵養之久則見面盎背氣象日別非聲音笑貌所能爲也又曰道有遠近學無止法近者道也遠者亦道也學者見其近而不見其遠遽止於見則陋矣惟於見處更加功夫進進不已自然所造深遠而其成也宏矣其發明後學大指類此雅好文詞既老不衰嘗曰文者所以載道言之不文行之不遠而世儒或以文爲不足學非也

顧其言於道何如耳每爲學者誦眉山之言曰物固有是理愚不能知之知之患不能達之於口於手辭者達是而已矣以爲此最論文之妙故其爲文指事析理引物託諭要以達意所欲言者而詞采自然如風行水上如浮雲遊太空中姿態橫生可喜可愕晦庵先生常評之以爲筆力奔放而法度謹嚴學者所難及也至他所爲詩騷閑肆俊偉畧皆稱是工書得顏蘇筆法人有得其簡牘者多珍藏之其爲人長不踰中人而貌古骨強神觀粹清言皆粲然成文聽者亡倦事推官公及繼母向夫人以孝聞友誨諸弟綺緘甚篤縉纈進士高第嘗教授福建二郡士人多推稱之然與緘先卒諸子孤露先生扶植教養如己子男婚女嫁皆有成立蓋自推官公之歿先生主家事者二十年閨門肅睦生計日贍內外未嘗有間言也其接賓客奉祭祀節之以禮儉不及陋祖賦之入常爲鄉里先雖在林下而事邑大夫不廢桑梓恭敬之節親戚故舊或以緩急告往往爲之排難解紛而不受其報或譏其既無求於世

何苦爲是拘拘者先生曰如是烏知吾心夫以傲爲高以放爲達以自私爲有守吾不爲也且禮與仁不可須臾去身況爲士可以去之乎郡守徐侯誼聞其風高仰之馳使奉書幣迎致郡庠使諸生矜式焉先生不得已強爲一行然亦竟不爲留也嗚呼若先生者學該而守約志獨而愛周一介不以與人而不以爲嗇一介不以取諸人而不以爲矯其古之人歟古之人歟紹熙四年先生之年七十有七矣八月二十有六日以疾終于家屬續之夕其言琅然不亂於是人益知其所養果有過人者也娶同郡朱氏再娶董氏王氏子男三人汝極李札叔桐皆種學績文有家法女二人嫁迪功郎江州德安縣尉王泰發進士王其孫男三人諸孤將以其年某月某日葬先生其鄉某原以書來告初先生之少也嘗從洵先君子學後洵復受業先生之門先君子之喪先生實狀其行以授晦庵朱公爲之銘今先生之喪諸孤以爲近而知先生者莫若洵遠而知先生者莫若朱公故復屬洵論以遺事將請於朱公洵自

惟晴昔從先生遊時年未二十今行年六十二而於公亦已老矣嗟日月之逾邁愴前輩之彫零其可以文詞不工為辭平力雪涕為之書紹熙五年三月十三日門人修職郎吉州錄事參軍程洵狀

季州奉其先君子行狀一不遠數百里請平於建康之東也拜起再而與公年二十餘始得一賢然其時年少新學未成有以是也

與公年二十餘始得一賢然其時年少新學未成有以是也

年復歸而再見公然後從其益觀而命予與鍾山所任為將

矣則義高說古今而深厚嚴密如其為人平心益公而自恨其

不能久聞公物故予以憂患疾疴之西問之則公之

後數年聞公物故予以憂患疾疴之西問之則公之

不以為難容以不相為託至受其狀而讀之則公之

餘不敏其何敢有發於言乎乃以病衰心力未如公之

來矣遂無以塞君子之意而姑記其端未如公之

辭予雖有作亦不能以文詞亦其師友淵源之有自也慶元九年十一月

人子弟多自好而不能於文詞亦其師友淵源之有自也慶元九年十一月

月癸巳冬至吳郡未幾

書于亭所居清遠閣

汪居士莘傳

李以申

汪居士莘字叔耕休寧人自幼不羈寢長卓犖有大志不肯降意場屋聲病之文乃退安丘園讀易自廣凡韜鈴之書釋老之典靡不究習屏居黃山稍遂高蹈意嘉定間會下詔求言遂三扣天閣論天變人事民窮吏汚之弊行師布陣之法不報慈湖楊公簡見其書曰真愛君憂國之言也時朱子召赴經筵未至莘逆通書言財不待先生而富兵不待先生而強惟主上父子之間諸公所不能濟者待先生而濟若憚於為父子深愛之本而利於為體貌臣工之末以是為治未有能久者今日之事先生建明稍緩切恐言者已伺其後是非不能為天下學道者之地亦恐不能為後世學道者之地朱子深重之用其言西山真公德秀在直院日嘗欲其俯屈以訪諸賢其自重如此徐貳卿誼帥江東謂其履行素高移檄本郡使備書史筆札抄錄著述欲以遺逸引薦于朝不果築室柳溪之上園以方渠自號方壺居士每醉必浩歌賦詩以宣其鬱積有柳塘詩詞傳於世

西山真與汪叔耕小簡德秀昨穎造行屏

不獲晉陪餘論重深悵仰適辱寵惠五言絕

向賢欲從者一柱訪之不知肯俯屈否更希示諭為幸右謹具呈即日
德秀劄子奉上汪文學士座右○王尚書應麟序集云文士以逸民
特招如老泉以歐公後山以坡公至於韓子蒼之流皆不繇科目進
塘居士觀西山帖欲居士俯屈以訪諸賢則其自重難進之節非招不往
豈特俗佻巧馳騁於名場利區染頤於爵標勢的者斯文金玉傳之不
朽居士之遇榮矣慈湖朴實之訓實允蹈之掌書貴孫其猶咀其華而
踐其實昔耕之而今獲矣重光協洽歲仲
秋月朔浚儀王應麟伯厚父書于歙郡齋

康範汪處士悼墓誌銘

呂左史

淳祐四年夏午叨除柱史七月朔日鄉之處士汪君處微父之子燾不
憚老火數百里來訪于京懇懇致辭曰壽不天先君子棄諸孤八年矣
昔者窳事嚴未克乞文納諸壙不孝之罪無以自贖今子秉史筆敢
疾馳再拜求墓道之銘庶俾潛幽賴以不泯不則蔽而不得記猶不葬
也一念純孝令人感動詎可無以塞其請矧處微父之賢午諗聞習敬
之其學術行誼足以防範名教其典刑風流足以標表區宇此漢文苑
逸民唐卓行孝友所傳之儔而所謂有道之士也國史且宜傳如之何

不銘乃即其門人所狀及午所知者叙之君名暉處微其字以紹興壬
午歲二月二十二日生少長風貌魁梧儀槩凝重已不類凡兒九歲即
遭父喪哀慕如成人事母以孝聞尚逮事其大母群從兄弟且同居承
順篤睦家庭無間言里黨翕稱之從鄉先達直閣汪公文振學蔚有文
聲力慕高遠凡國治官民政俗靡不究期為有用之學也慶元癸亥會
其長兄暘以五舉得官竟不受以死君即感傷無用世意至開禧丁卯
猶覓舉闕下時方用兵事日復異慨然嘆曰是尚可求仕也歟哉不就
舉而歸盡棄所業儵然不以名第介意嘉定壬申元妃胡氏亡手營一
丘縣南五里許山如玉環因想唐人盤谷之趣結廬其中名曰環谷更
作堂以靜觀扁之取明道程子萬物靜觀皆自得詩意自非疾息無日
不徜徉於斯君時年五十既不事科舉即取六經諸子旁及二氏之書
研精覃思窮理盡性求所謂自得者安於貧約飯藿羹藜一飽欣有餘
喜於修時望花隨柳四時吟不足處家尚雍肅曾無疾聲遠色奉先務

嚴索靡有慢心惰容墳墓之有侵伐必禁族姻之有慶弔必赴以孝悌
媵睦訓家之子弟以忠信篤敬詔里之後生急難相求者援之顛連無
告者卹之解無益之忿爭扶欲破之義役凡利可興害可除者無不盡
其情由是德意薰陶里俗丕變人至不犯於有司誠心貫通水旱禱穰
神亦無往而不格是豈僥倖於一日者哉年逾六十學益老道益充深
有得於孟子養氣之旨復於先廬葺堂榜以善養而居之曾中之浩然
者可想也給事袁公甫守徽日雅聞君名至紹定間持江東常平節一
路大侵君獨能爲鄉邑區畫勸分貧富得所袁公行部造門未見君以
編氓固辭袁公歎息而去更欲狀其事以聞諸朝君又謝不可叅政真
文忠公德秀亦久知君端平甲午秘監李公遇適宰是邑真公屬求君
言行之實將以名氏薦未及剡而真公薨人莫不爲君抱憾君則曰天
知我厚矣李公之在邑也政有所不通事有所可疑多咨取於君至公
退餘閒又未嘗不詩酒相倡酬也後君寢疾李公入問君咸無所屬賦

如夢令一闕而逝時嘉熙丁酉四月二十有六日得年七十有六里人
追哀而聚哭之李公率僚屬致祭文爲之誄稱君清不絕物和不失已
相與私謚曰康範處士咸以爲知言噫若處微父可不謂之有道之士
乎汪氏爲吾州著姓派實本英濟王績溪則王所毓之地故文屬尤蕃
大君之曾大父激三拔鄉薦以南廊恩授文學元豐間黃門蘇文定公
爲邑宰與之遊甚相得娶古靈陳氏大父文中娶崔氏繼大梁孟氏該
淳熙慶恩封孺人父三錫本伯氏安中季子祝氏所生文中命以爲嗣
祝氏於徽國朱文公母夫人爲諸姑三錫娶葛氏繼滕氏章敏公曾孫
女君勝出也旣生有淑質復得二外家休光餘慶照映沾丐故其學
行風節端確淳明如此君爲文多律傑吟詩率成咳唾間平生著述有
曾子子思子二卷爲全書他文未成集娶胡氏即先葬環谷者至是奉
君柩而合兆焉是爲良安鄉杭村之原時嘉熙己亥四月十一日也子
男四人長開蚤世次即燾也次點俱業儒學然亦蚤世女一人未及嫁

而亡孫男二人寅啓午竊惟清而不激和而不流昔張君嶧以稱邵堯夫先生清不絕物和不失已今李公遇以稱吾處微父稱吾處微父如稱堯夫夫誰曰不宜午祝氏之館甥也按是則於君家嘗有一日之雅今又獲讀君行編而知諸公之推許者若是其與荀淑戴良郭林宗輩之於黃叔度何以異使午得爲君傳亦必述李公之辭贊之今姑卽以爲銘銘曰

夷清惠和俱聖之儔隘與不恭豈聖未優去就若殊望望由由聞風者興天地同流吾處微父淵乎其似清不絕物和不失已將可比堯夫之不激不流亦上師夷惠之廉頑寬鄙故生也安貧樂道能康濟乎一身沒兮樹石表行垂範模於百世

吳益謙自牧墓誌銘

呂左史

新安文風尚矣至近世程文簡公大昌棣華二吳俯徹皆學博才高文追古作得其傳者名大學冠南宮項背相望爲時聞人晦菴朱先生又

以道學倡天下戶外之屨常滿吾鄉秀彥固有親炙之者而未多見豈以爲東家立邪文公自韋齋徙居建徽在萬山中士安所習不憤負笈遠遊往往有聞而知之耳東閣許兵部文蔚在上庠刻意斯學爲司成葉公適所知以上舍解褐教授于家靜菴吳益謙實爲門人高第益謙諱自牧世居歙溪南曾祖某祖某父某皆隱德弗仕益謙幼敏悟受業鄉先生王令君便蒙鑒賞尚書金公安節亦以年稚文健未易量稱之後慕東閣之學盡棄其學從之游年十四已有聲場屋稍長俯視輩行不肯徇流俗爲時文嘗取鄉薦三上春官輒不利益謙不以爲意退講究問辨益自信其所得作講義史評雜著數百篇皆有理趣執經來學歲百餘人有預鄉書及蘭省者嚴陵詹駕草民亦師東閣於益謙爲同門友洎來守新安首尋訪道舊興嘆處以學職四明李寺丞以制與其弟以申相先後爲郡博士咸知敬重由錄而正領袖多士其文學淵源如此益謙事親孝居家儉謹以處身和以待人救災恤貧爲宗族里鄰

所信愛諸父將分異具載書益謙願受數少者此書上縣令疑其不均必致訟後竟無辭新安人士日盛歲貢額極狹端平申牛科舉有詔益謙率士友告州中朝廷官得增二丙申頌履畝之令州委舉職議益謙奮筆乞減免尋獲旨佳科此其行義大略自學問中來也益謙於所居號靜菴又創堂闢軒曰風月曰青紫皆自為記發明動靜之旨浴沂之意格物之學為時貴有識所稱許晚記可軒亦足軒以示訓家庭皆非苟作者益謙經史淹該旁通百氏嘗自營樂哉之丘於大富山窵哥偶二室以俟息焉又為屋以寓守者扁曰伴遊且書其棺之簞曰斂手足形枕簞之安原始及終是為達觀一日蚤作命子若孫來前曰爾曾立身行已之道平昔言之熟矣生死之理真同夢幻吾將逝矣其以明年十月九日吉辰奉五板藏之母勿言訖而逝實嘉熙丁酉四月二十日也享年七十有七娶程氏先卒子男四人長起莘次起宗繼從叔後次起蒙起黃女四人適進士程誠進士胡希孟進士方子回進士謝炳孫

男應辰業進士孫女五人適進士汪銓進士鮑鑑餘尚幼曾孫男全壽誥誥未艾是必有能昌其學者矣起莘等從治命奉篋事前期具行實來求志銘每念益謙與其弟益欽俱以文行高月旦評號溪南二吳某學晚無師獨二難一見以為可語遂為忘年友文場燈燭同之某偶先登既而益欽以不克成卒今益謙又以不克成卒成不成何足計顧前輩零落殆盡後生莫見典刑感今懷昔為之隕涕謹叙而為銘銘曰大溪之南爰伉其門大富之山聿新其墳師友淵源不墜斯文經訓蓄

奮貽厥後昆曹弘齋溪南吳氏長虹先祠祀歛西溪南吳氏故大家宋先十五年而貢貢之二十六年試南廟教授文舉未及銓注而卒得卜

于所居之南二十里曰長虹葬焉踞坎挹午四望適停延衰可十畝佳

山水也歲嘉熙庚子厥孫景深翁附焉去之六昭右穆之圖呂氏婺州

會孫君寶翁附焉其配汪氏壽歲附焉伊川左昭右穆之圖呂氏婺州明招山之例有相似者同里讚之里以鬼饗始謂之備乃即東偏築屋未也古不墓祭重廟祭卜兆之次繼以鬼饗始謂之備乃即東偏築屋奉三塋之祠而曹涇為之記涇聞之先賢莫為於前其美弗彰莫為於後其盛弗傳藉翁由科舉登名立門戶朝發軔折微有欠憾未宅協吉如相補除神靈安子孫成慶事殆未有涯前之為不可泯也維申用治命襄事孝思所拓如梯斯攀三世合弁一堂揭妥今日之祠遂當與此

山此水永相映帶後之爲何如哉昔徐執氏之思亭餘姚氏之存菴
止爲父母或無昆弟後山野處二公猶爲之嗟惜不容口使秉此筆當
何如言而惜也涇之筆力弱也因歸來長虹苟有以煮後兮寧其勉躬
翁聞鬪開兮詞鋒較正南兮北風歸來長虹苟有以煮後兮寧其勉躬
竟來兮深翁櫻花黃兮青驄梁效熟兮道窮歸來長虹視乃厥祖兮事
將無同竟來兮寶翁早孤而立兮晚壽宜隆足見先人兮夜臺西東歸
來長虹後百年兮德耀依鴻亂曰水堯兮山重
千載兮斯宮案繁兮盛豐百祿兮來崇是爲記

宋江西轉運幹辦公事程公晞尹墓誌銘 方虛谷

予守睦屈休寧程君克紹簿遂安尋爲直代去不復仕蓋詩禮之學有
自來今得汪君宗辰所述君先公行實觀之乃知子之賢父之教也公
諱晞尹字聖任號隱莘居士少負大志若昔阿衡曾祖儼祖莘考嶸自
忠壯公靈洗後世爲新安望姓家地名大富營去汭口十餘里故端明
殿學士程公秘所居也端明器公以所親吳氏女妻之公性簡訥重然
諾從師取友聞博見新舉動不凡早失怙偕內子事母孝事必稟命不
擅食必親進不委婢姐疾必親嘗藥曉夜不解帶毋飯乃飯毋安乃安
風木疚懷練祥猶慕姊嫁而貧生養死藏視甥如子完其一家中表能

治生者貧不取贏疎且遠待而舉火者不一晚欲做范文正爲義田而
年與意違由家出汭口兩岸夾澗險阨迫窄寒病涉潦望洋椎鑿煨燒
破折崔嵬去阻就夷頽穹益卑杠梁成輿馬通靡瀕靡跌凡四世歲不
輒工權衡斗斛守高曾舊物歛散平均無他人輕出重入之弊里之爲
富者責逋租息子倍本公惟征定額久則毀券以其才足負荷斯世而
名場齟齬授承節郎江西轉運司幹官壯心灰矣即第之東刊山樊圃
引流種樹亭榭潔雅與賓戚相觴詠借謝傳之東山名之微恙不起公
生於嘉定八年乙亥卒於咸淳七年壬申壽五十有八德祐元年乙亥
藁殯於近里之萬竹至元二十年癸巳改葬于遂安龍耳峯之南公會
祖墓在龍耳之北孺人吳氏生受恩封先七年卒墓在龍耳之西子一
人即克紹與婦戴氏度公佳城二十餘年而後得卜安靈三丘密爾誠
孝所感豈偶然哉孫男三人清正儀孟仲踰冠讀父書克家孝尤岐嶷
孫女一人及笄許嫁婺源迴嶺汪氏銘曰

種德為根枝子葉孫采花食實若古桃源是為積善之門鑿谷書云八十二字古文以簡為貴簡則可以傳遠愧回所作未能簡耳書與篆額得名士為佳仍須佳石則久而不泐回拜手

汪常簿復傳

洪杏庭

汪常簿復字晞顏婺源人登景定三年第舉遷監行在豐儲左倉朝議
倒廩揚精鑿恩畿卒諸倉惠之復抗辭謂邊士勞苦精糲何擇畿內卒
驕久矣今又啓之脫一日給粗惡若曹能安乎兵部侍郎吳革以白廟
堂事遂寢初復之父嘗佐賈似道於鄂閩復已知名及賈專國宰相擬
官見復姓名指之曰人望也見慕如此而復終不願附為太學博士司
業盧鉞問復朝議弼士籍何如復毅然曰天下多事矣軍民業業皆有
離心可又為此以失士心邪賈聞甚憾咸淳庚午除太常寺簿數月以
臺論去仕至朝奉郎通判揚州至元甲申行臺訪求耆德江東得九人
以復為首復潛使辭焉後部使者盧公摯至邑強請見因勸以仕復愀
然曰亡國之大夫猶踽踽為世用公何取焉卒年六十八先是德祐末

家居兵至正坐不去兵欲執之子願以刃拒一兵斃左右負復以走眾
遂殺願丞相馬廷鸞以書言曰能執干戈衛父母世不之童踦矣

年十四云馬君相回汪晞顏常簿書予十年與雜友所歷者何

生讀元次山化說自道德為著然所以化以至為顏容為風俗所以吾見其
人矣吾聞其語矣自天地化為鐵鑊以至於鳥為化為石吾聞其語矣
未見其時也而乃今見之雖然吾見次山之所見而化而為市兒此語殊
不足信何者其平生交游影滅烟散而浮溪之上有前太常書伯在門
於是信何者其平生交游影滅烟散而浮溪之上有前太常書伯在門
今遂為天之遠使成其當年非據之學表聖之節勿安之知
尤重其言蓋與訪問死生之幅藁然奪目將為我賦十月之交以為壽
朝呻哀吟與一豎尋於無涯久已厭之矣亦豈不足當此但呼兒拜手
占若祝以善藏珍題之緘而識之曰此某年某官某
執之所祝非辛未壬申錦標玉軸者比也其何敢忘

胡主簿次焱傳

洪杏庭

胡主簿次焱字濟鼎婺源人少孤家貧母氏策勵以學幼書不輟博覽
強識魁江東混補在上庠公私試輒占高等登第授迪功郎湖口縣主
簿以道遠祿養非便改授貴池縣尉既任簽憲郡幕錄五縣囚人稱平

允有鬼物慙毆死者獲伸於公德祐乙亥微服歸鄉或以宦進招之賦
媒發問答詩以見志金華胡公長孺跋其詩曰宋疆於淮重兵在山陽
盱眙合肥池岸江城惡渠隘淺荷戈不滿千人兵未及境都統制張林
已納款降附與異意輒收殺之當是時濟鼎爲附城縣尉貴池羸廷弓
手數十百人勢不得獨嬰城家寒親耄無壯子弟供養際張出迎托公
事過東流縣作冢其道周書木爲表識曰貴池尉死葬此下用杜張猜
疑令不相尋迹歸婺源以易教授鄉里往來從學者常百許人昔人稱
慷慨殺身易從容就義難濟鼎蓋從容就義者歟

紫巖先生汪公宗臣行狀

汪以質

公諱宗臣字公輔號紫巖唐端公十一代孫也曾大父諱夢徵號適安
逸人晚年更號友鹿居士年十四父喪奮然自克務學命方六中亞選
補國學內舍免解屢試禮闈不第遂無仕進意乃游江淮歷高岱走關
洛以歸因賈茗于常不事產業紹定壬辰自荆溪息踵寧居於是關東

岡築亭上曰友鹿下曰侶魚娶俞氏生二子長曰居安次即公之大父
也諱居易卓犖有幹幹科舉不利復修常之別業增至千五百餘戶於
所居之東偏闢池建書堂延族巨儒梅澗先生訓導親族子弟扁曰信
齋因以自號晚授迪功郎兩浙運司幹官未任而卒娶胡氏無子覓胡
氏幼弟爲嗣侍妾數人時氏生有尚父諱有聞號坦翁嘗以書見閩帥
立信公合宗譜爲之留款給榜曉示復卜居于祖屋之左名睦肥堂子
孫同居六世矣享年八十歲娶江氏享年七十七歲二男五女公其長
也次曰季洲公生嘉熙己亥十月二日爲人端慤好讀書賦質雖鈍勵
志自修幼學于梅澗先生先生學于毅齋沈先生其學淵源實自考亭
咸淳二年丁卯六年庚午兩中亞選遭宋末造引身不仕乃遊鄉校與
海寧程運幹希尹父子交四十餘年無間自扁其游息之所曰寓所命
族姪孫炎祖作記因與虛谷方使君甚善公爲撰運幹行狀請銘于方
公回緘乞紫巖先生商畧公爲刪改二十餘字方公嘆伏父母有疾即

命醫檢方親製藥餌精誠所感服之良愈及卒哭之過哀三日而食一
以禮自遵親友交相慰曉爰攷諸史籍著爲世秉窺斑一書辨論精明
文思高古雲峰胡先生定宇陳先生深嘆美之又集詩書詩文爲四卷
自序其始末以遺孫子泰定三年恩加父老錫以帛縷至順元年詔民
間九十以上者有司無役其子孫故雲峰先生書中言公之耆年碩德
爲不可及其略曰老先生年將百歲而有七十歲之子五十歲之孫曾
孫年近三十且又見玄孫書聲滿家綵衣五世祖見孫而及見孫之孫
孫養祖而逮養祖之祖端爲吾新安盛事庚午九月十二日忽感疾至
晚屏退家人命諸子親與沐浴振衣正冠居于牖下謂曰吾學不名家
何功於世吾沒之後治喪則稱家有無切不可過禮不可作道佛二家
齋醮亦莫爲陰陽拘忌汝等切不可違命是吾死爲無知也吾亥時當
長往與親厚決別至是遂終焉壽高九十有二歲葬後村娶游氏壬寅
五月三十日生年八十六與府君同受恩帛後至乙亥又受表裏而終

子孫得免戶役者十餘年歿于乙亥六月十七日壽高九十有四歲葬
後村子男五人長曰勝娶游氏次曰同能讀父書娶程氏三曰元堂時
大三帥幹有常寓行在屢書覓而爲孫有詩名世勅授平江路教授娶
相府謝氏今居崑山趙家莊四曰定娶游氏五曰順繼六弟爲嗣乃父
命也女來弟適里中游梅巖存德孫男六人曰泰壽娶游氏曰朋壽娶
江氏曰眉壽娶游氏曰祖壽娶俞氏曰柏壽娶江氏曰臨壽娶詹氏曰
元壽娶程氏曰翼壽娶游氏曾男孫十二人天祺天禧延安崧生修老
儀生天全天貴漢老梧生皆公命名公歿後而震生魯生生焉實祖宗
厚德所致也斌幼視公之行實爲審謹叙其大槩以託立言之君子圖
不朽云時至正九年歲在戊子七月丙申姪孫斌謹狀


程義士楚翁傳

家乘

程義士楚翁婺源彰睦人忠壯公之後也性倜儻喜問學豪于詩嘗叅
請于須溪須溪稱其逸才必當名世德祐末元兵入臨安江東列郡皆

下楚翁憤憤散家貲陰結敢死士將復郡城因以舉事事洩被執榜掠
幾死夜以金賂守者得脫去之番陽時碧梧馬丞相拜鸞義不仕元楚
翁往投之碧梧義其爲人遂客丞相所久之聞疊山謝提刑枋得在閩
又去之閩客疊山所會時事稍定潛歸婺源人有虞之者復走閩凡十
年間關險阻一寓于詩有黍離麥秀之感讀之令人涕下疊山被執北
去楚翁悵悵無所依亦死逆旅中其所著述經兵燹後片紙隻字無復
存者惜哉○碧梧贈楚翁詩曰汗竹丹鉛側空花粉黛中尚懷丞相亮
肯署大夫雄有客來今雨誇予邁古風幽情傾不竭渺渺碧雲東○疊
山贈楚翁詩并序曰客閩十一年不敢談詩玩楚翁新吟猶有望春雲
懷李白者堂前擊筑高漸離橐中亦可一出乎夜得絕句敬呈楚翁江
東未覩舊衣冠腹有詩書行路難蒲柳春風且收淚五陵佳氣逼雲端
慈母倚門曾教兒吾君何在汝何之堂前戲玩忘憂草聞說齊王歸有
期近日人傳使嶺梅南枝落盡北枝開長安舊日元無此盡是江東人

送來○又跋楚翁詩卷曰五帝三王自立之國至德祐而滅有天地以
來無此變也理之變氣隨之西北巖凝之氣盛行於東南吾序陳月泉
詩已言之後六年而驗又十一年程楚翁出詩一篇氣清和而志深遠
有風人遺音王澤未竭民彞未泯豈與文士角技巧哉虵豕豺狼怒其
前梟獍猥偷仇其後楚翁置禍福死生於度外毅然以天地大義爲己
責幾殞榜筆幸逃鋸鉞逋播十年本志弗渝豈不真男兒哉黍離忠矣
義氣不足以感人無衣勇矣忠誠不足以悟主周轍不西千古同恨安
得楚翁之心見於彼時乎安得楚翁之詩作於彼時乎撫今懷往事可
爲痛哭者多矣由後視今不知志士仁人之心亦可以快否乎善學詩
者當自得之丙戌二月望日廣信謝枋得書于卷後



Handwritten text on the right edge of the right page, oriented vertically. The text is partially obscured by the book's binding and appears to be a list or index of entries.

程